


**TEZĂUR LITURGIC**  
**13 IANUARIE**

**ACATISTUL**  
**SF. CUVIOS**  
**IRINARH**  
**DE LA**  
**ROSTOV**



**MOSCOVA, 2000**



# **Акафист**

## **святому преподобному**

## **Иринарху, Ростовскому**

## **чудотворцу**

### **Кондак 1**

---

Избранный угодниче Христов и преславный чудотворче Иринарше, дивно на земли в чине ангельстем пожил еси и ныне, яко имеяй велие дерзновение ко Господу, буди теплый о нас пред Богом заступник, да с любовью зовем ти: Радуйся, Иринарше преподобне, пустынножителей светлое украшение.

### **Икос 1**

---

Ангел земный и человек небесный явился еси преподобне Иринарше: от юности бо твоя Господеви благоугождая, все житие твое в добровольном подвиге страдальчествования проводил еси и Рая присноблаженнаго достигл еси, идеже ныне ликуя, услыши и нас, на земли поющих ти таковая:

Радуйся, православная церкве Христовы  
превеликое украшение.

Радуйся, отечествия твоего светильниче  
пресветлый.

Радуйся, любовью ко Господу сердце твое от  
юности уязвимый.

Радуйся, и сам от Него возлюблен бывый.

Радуйся, воине Христов добропобедный.

Радуйся, силою свыше облеченный.

Радуйся, Царствия Небеснаго наследниче.

Радуйся, о всех чтущих тя усердный  
молитвенниче.

Радуйся, Иринеарше преподобне,  
пустынножителей светлое украшение.

### **Кондак 2**

---

Видевше рождшии тя и знаемии, яко  
Благодать Божия почи на тебе, блаженне,  
радостью Святою радовахуся, и Христа о сем  
славляху, поюще Ему: Аллилуиа.

### **Икос 2**

---

Разума Божественна исполнився, познал еси,  
преподобне, яко благо есть мужу, иже возмет

ярем Господень на ся от юности своея, и сего ради во след Христа со усердием потекл еси. Темже зовем ти:

Радуйся, иго Господне на себе вселюбезно приявый.

Радуйся, в терпении спасения души своея искавый.

Радуйся, во смирении твоём Сыну Божию, смирившемуся до рабья образа, подражавый.

Радуйся, Бога и ближняго твоего паче себе возлюбивый.

Радуйся, слезами на земли сеявый.

Радуйся, притекающих к заступлению твоему послушателю скорый.

Радуйся, Иринарше преподобне, пустынножителей светлое украшение.

### **Кондак 3**

Сила Вышняго от юности даровася ти, блаженне: далече бо сый, кончину отца твоего умными очима узревый, и братьям своим по плоти о сем возвестивый, сим удивил еси тыя и научил еси звати Богу: Аллилуиа.

## Икос 3

Имый всеусердное о спасении души твоея попечение, во обитель страстотерпцев Христовых Бориса и Глеба притекл еси, и тамо, пред игуменом пад, о вчинении себе в лик иноков всеусердно молил еси, еже и улучил еси приемый постриг главы твоея во отвержение мира и сует его. Мы же сия зряще, таковая поем ти:

Радуйся, мирская возненавидевый, да Христов раб будеши.

Радуйся, постниче терпеливейший, хлебом живота вечнаго душу твою питавай.

Радуйся, во плоти небесный жителю.

Радуйся, наставниче великий к путем спасения.

Радуйся, трудолюбием твоим во обители Борисоглебстей просиявай.

Радуйся, страстотерпче Христов долготерпеливе.

Радуйся, постников похвало и славо.

Радуйся, воздержания подвижников чистейшее зеркало.

Радуйся, Иринарше преподобне,  
пустынножителей светлое украшение.

#### **Кондак 4**

---

Бурю велию напастей воздвиже на тя  
ненавидяй добра диавол, обаче не поколеба  
доблести души твоея, посреди пещи искушений  
немолчно Богови зовущаго: Аллилуиа.

#### **Икос 4**

---

Слышав Господа в Евангелии своем  
глаголюща, яко многими скорбьми подобает нам  
в Царствие Небесное внити, уготовал еси плещи  
твоя на раны и ланите на заушения, всякое  
озлобление ради Христа претерпети готовый.  
Мы же, сицевую высоту духовныя жизни твоея  
зряще, ублажаем тя похвалы таковыми:

Радуйся, всего себе в волю Господню  
предавай.

Радуйся, Христа Распятаго паче всего  
возлюбивый.

Радуйся, терпением злостраданий Иову себе  
уподобивый.

Радуйся, язвы Господа Иисуса на теле твоем  
носивый.

Радуйся, узы Христовы на ся возложивый.

Радуйся, ужема железныма коварства  
вражия связавый.

Радуйся, величием подвигов своих ангелы  
возвеселивый.

Радуйся, жестоким твоим житием человеки  
удививый.

Радуйся, Иринарше преподобне,  
пустынножителей светлое украшение.

### **Кондак 5**

---

Боготечней звезде подобяся, протекл еси  
земное поприще твое, Иринарше, всемогущею  
Благодатию Божиею покрываем, и небесных  
видений сподобляем, в нощех и во днех поя  
Владыце: Аллилуиа.

### **Икос 5**

---

Видевше тя иноцы обители, в ней же  
подвизался еси, земная презирающа, и в рубех и  
необувенныма ногама ходяща, вознегодоваша и  
двакраты из ограды своея извергоша. Ты же,  
незлюбив сый, во град Ростов текл еси, о  
изгнавших тя молитвы возсылая. Сего ради  
приими от нас сицевая:

Радуйся, терпением скорбей всяческих  
просиявый.

Радуйся, вольною нищетою вечное богатство  
стяжавый.

Радуйся, всяцем образом Владыце всех  
угодивый.

Радуйся, равноангельное житие на земли  
поживый.

Радуйся, веры светлый светильниче.

Радуйся, ко грядущему граду верный  
наставниче.

Радуйся, вся земная во уметы вменивый.

Радуйся, незлобием твоим ризы души своея  
убеливый.

Радуйся, Иринарше преподобне,  
пустынножителей светлое украшение.

### **Кондак 6**

---

Проповедницы воли Божественныя о тебе  
явишася самобратия Святая Роман с Давидом, и  
в видении тебе представше, во обитель свою, из  
неяже изгнан был еси, паки тя глашаху. Ты же  
от видения воспрянув, и радости исполнься,  
Богови воззвал еси: Аллилуиа.

## Икос 6

Возсиявша благодатна светильника, яви тя Господь, егда не ведомыми судьбами своими из ограды обители святых мучеников во град Ростов тя изведе, да и во обителях Авраамиевой и Лазаревой прославится о тебе имя Его. Мы же таковому о тебе Божию смотрению удивльшеся, глаголем ти таковая:

Радуйся, орудием воли Божия бывый.

Радуйся, во смиренномудрии поживый.

Радуйся, страсти в души твоей искоренивый.

Радуйся, явлением ти преподобнаго Авраамия почтенный.

Радуйся, союзом любви со блаженным Иоанном себе связавый.

Радуйся, прозорливым глаголом уст его внимавай.

Радуйся, стогны ростовския подвиги твоими освятивый

Радуйся, о всех притекающих к тебе усердный молитвенниче.

Радуйся, Иринарше преподобне, пустынножителей светлое украшение.

## Кондак 7

---

Хотяй всем спастися Владыка Господь чудным гласом воспяти тя от намерения твоего оставить пределы ростовския и к северу уклонитися. Ты же, послушлив сый, всего себе воли Его предав, воззвал еси Ему: Аллилуиа.

## Икос 7

---

Новый воистинну Даниил явился еси, преподобне, в дивнем видении твоём узревый грядущия судьбы Царства Российскаго, и повеление от Бога прием, потекл еси ко граду Москве, идеже царю Василию небоязненно рекл еси о всех, хотящих быти. Мы же, тайнозрению твоему дивящися, сицевая тебе приносим:

Радуйся, провидче дивный, будущая яко настоящая, узревый.

Радуйся, духом твоим о сих вельми возскорбевый.

Радуйся, веления Божия послушнике усердный.

Радуйся, небоязненно повеленная ти царице явивый.

Радуйся, словесы твоими сего укрепивый.

Радуйся, беззаконий сынов ея твердейший обличителю.

Радуйся, о спасении Царства Российскаго богоугодный молитвенниче.

Радуйся, о мире Державы Российския пред Господем предстателю.

Радуйся, Иринарше преподобне, пустынножителей светлое украшение.

### **Кондак 8**

---

Странен и дивен путь спасения протекл еси, блаженне, егда от иконы Распятия Христова повеление восприим, в затвор вшел еси, в нем же тело твое ужема железныма связав и множество железных крестов на ся возложив, во дни и нощи Владыце твоему звал еси: Аллилуиа.

### **Икос 8**

---

Весь был еси умом и сердцем в горнем, аще и в хижине малей заключився, преподобне. Тем же и ныне водворяяся на небеси, заступаеши всех, верою и любовью вопиющих ти таковая:

Радуйся, в терпении и злострадании житие твое препроводивый.

Радуйся, волю свою заповедем Господним покоривый.

Радуйся, благодатию Духа Святаго осиянный.

Радуйся, источниче чудес богодарованный.

Радуйся, исцелений независтный подателю.

Радуйся, немудрых богомудрый наказателю.

Радуйся, правды Божия нелицеприемный возвестителю.

Радуйся, обидимых многомоцный защитителю.

Радуйся, Иринарше преподобне, пустынножителей светлое украшение.

### **Кондак 9**

---

Во всяких напастех и скорбех всем был еси утешитель благодатный, тугу сердечную страждущих словесы и молитвами твоими прогоняя, и во уповании на помощь Вышняго тех укрепляя, и научая пети Ему: Аллилуиа.

### **Икос 9**

---

Витии многословесныя по достоянию восхвалити не возмогут мужества души твоея, богомудре отче наш Иринарше: варваром бо на

обитель твою находящим и иноком ю оставльшим, ты един пребыти zde не убоялся еси, Богу себе вручая. Темже любовию восхваляем тя сице:

Радуйся, убивающих тело, души же убити не могущих, не устрашивыйся.

Радуйся, воине Христов непоколебимый.

Радуйся, жизнь будущаго века паче временнаго жития возлюбивый.

Радуйся, силою словес твоих, благодати исполненных, врагов обличивый.

Радуйся, теми ярость сих в кротость преложивый.

Радуйся, пред военачальники вражиими православна и верна быти Царю своему исповедавый.

Радуйся, хищений их небоязненный обличителю.

Радуйся, грядущаго на них гнева Божия верный возвестителю.

Радуйся, Иринарше преподобне, пустынножителей светлое украшение.

## Кондак 10

---

Спастися хотящим человеком, добр вождь явился еси, преподобне, от египта страстей в земли обетованней тех путевождствуя и ученьми своими наказуя, во еже пети Творцу всех: Аллилуиа.

## Икос 10

---

Стену неборимую и ограждение нерушимое не точию обители твоей и стране ростовстей, но и всей Державе Российстей дарова тя Господь, всеблаженне, ибо благоприятными твоими молитвами оныя ограждаеши и от нахождения иноплеменных свобождаеши. За сия убо прими от нас похвалы сицевыя:

Радуйся, российстей земли Богом дарованный защитителю.

Радуйся, святая обители твоея неусыпный хранителю.

Радуйся, любовь твою ко отечеству земному в житии своем явивый.

Радуйся, туюжде любовь к нему и по смерти сохранивый.

Радуйся, князя Димитрия Крестом  
Христовым благословивый.

Радуйся, небоязненно тещи на освобождение  
царствующаго града Москвы глаголы своими  
того утвердивый.

Радуйся, свобождению царскаго града  
предивный помощниче.

Радуйся, светом небесным, приходящия к  
тебе озаряяй.

Радуйся, Иринарше преподобне,  
пустынножителей светлое украшение.

### **Кондак 11**

---

Пение непрестанное во всем житии твоём  
Богви приносил, еси, преподобне отче наш  
Иринарше. Ныне же от нас воспеваемый и по  
достоянию ублажаемый на земли, тамо, на  
небеси, купно со ангелы прославльшему тя  
дивно Господеви зовещи: Аллилуиа.

### **Икос 11**

---

Светозарна светильника яви тя, блаженне,  
Христос Бог, егоже сиянием людие  
просвещаются, и тебе, яко спасения их  
виновнику, приносят таковая:

Радуйся, доблей подвижниче, враги спасения победивый.

Радуйся, изгнания благодушно приявый.

Радуйся, изриновение из затвора твоего и биения злых человек претерпевый.

Радуйся, душу твою дарованьми небесными украсивый.

Радуйся, в воздаяние трудов твоих и болезней силу прозрения и чудодействия получивый.

Радуйся, мучительства злых бесов человеки свободжаяй.

Радуйся, даровании Божиих всем подателю.

Радуйся, ко грядущему Граду Небесному верный наставниче.

Радуйся, Иринарше преподобне, пустынножителей светлое украшение.

## **Кондак 12**

---

Благодатию, данною ти от Бога, отче, преведи ны безбедно по бурному морю житейскому, и в тихое пристанище Небеснаго Царствия сподоби достигнути, да тамо, вкупе с Тобою, в безконечныя веки Владыце нашему поем: Аллилуиа.

## Икос 12

Поем дивное твое житие, блажим великия и преславныя твоя подвиги, почитаем честную и достохвальную кончину твою, величаем небесную славу твою и от избытка сердец наших похвальная зовем ти сице:

Радуйся, в чертозе небеснем лику святых сопричтенный.

Радуйся, христианом скорый помощниче.

Радуйся, нищету совершенную до конца сохранивый.

Радуйся, тягчайшия вериги твоя, яко утварь драгую, на плещех своих носивый.

Радуйся, врачеваний безмездных всемилостивый подателю.

Радуйся, ленивых к подвигом возбудителю.

Радуйся, исправления грешников поручителю.

Радуйся, обители твоя и страны ростовския славо.

Радуйся, Иринарше преподобне, пустынножителей светлое украшение.

## Кондак 13

---

О всехвальный угодниче Христов и чудотворче предивный, преподобне и преблаженне отче наш Иринарше, с верою и любовию вопием тебе всеусердно: прими ныне малое моление сие наше, и умоли Милостиваго Бога, да избавит нас от всяких бед и напастей, и будущия свободит муки, вопиющих Ему: Аллилуиа, Аллилуиа, Аллилуиа.

*(Этот кондак читается трижды, затем икос 1 и кондак 1)*

## Молитва

---

О предивный и преславный чудотворче, преподобне и достоблаженне отче Иринарше! Величающе труды твоя и болезни и прославляюще великое твое дерзновение ко Господу, тебе, яко отца чадолюбива, молим: ходатайствы твоими испроси нам у Господа, яже на пользу душам и телесем нашим: веру праву, надежду несомненну, любовь нелицемерну, во искушениях мужество, в злостраданиих терпение, в благочестии преспеяния, и благословение свыше на вся благая дела и начинания наша. Испроси угодниче Христов у Всемогущаго Бога:

страждущую страну Российскую от лютых безбожников и власти их да свободит, и да воставит престол православных царей: верных рабов Его, в скорби и печали день и ночь вопиющих к Нему, многоболезный вопль да услышит и да изведет от погибели живот наш. Не забуди, чудотворче святыи, милостивно присещати обитель твою, вся грады и веси страны нашея, сохраняя и соблюдая молитвами твоими от всякаго зла. Помяни всех, веру к тебе имущих и имя твое на помощь призывающих, и вся во благих прошения их милостивно исполни. Ей, святче Божий, не лиши и нас грешных твоего заступления, сподобляя нас кончину жития благоулучити и Царствия Небеснаго наследники быти, да воспоем и прославим дивнаго во святых своих Бога, Отца, и Сына и Святаго Духа, в безконечныя веки веков. Аминь.

